

INTERAKSI SOSIAL BELIA ISLAM KOMUNITI PENAN DI BINTULU, SARAWAK

AHMAD NASIR MOHD YUSOFF

ABSTRAK

Interaksi belia Penan dengan Islam di bahagian Bintulu Sarawak masih di peringkat awal termasuk kefahaman terhadap ajaran Islam, adat serta pantang larang yang bertentangan dengan Islam. Pemerhatian yang dilakukan di lokasi kajian menunjukkan mereka mempraktikkan ajaran Islam pada peringkat asas sahaja seperti mengucap dua kalimah syahadah, mempercayai rukun iman dan Islam serta berinteraksi dalam kelompok belia yang sama agama tanpa wujud prasangka tetapi tidak pada Penan bukan Islam. Sehubungan itu kajian ini bertujuan menganalisis hubungan dan interaksi yang terjalin antara belia Penan Islam dengan Penan bukan Islam yang berbeza anutan. Metodologi yang digunakan untuk melaksanakan kajian ini ialah kajian kepustakaan yang menyentuh secara umum lokasi penempatan etnik Penan bahagian Bintulu. Kajian lapangan yang melibatkan beberapa kaedah turut dijalankan. Instrumen soal selidik diedarkan kepada 304 orang responden di perkampungan Penan Muslim Bt 10, Kg Penan Bt 12, Kg Penan Bt 12 ½, Kampung Penan Yuh Suburbun Jaya dan Kampung Penan Suai. Kaedah temu bual yang dijalankan adalah secara rawak dan pemerhatian. Hasil kajian mendapati terdapat bentuk-bentuk interaksi yang diamalkan sebelum memeluk Islam dan terus diamalkan apabila mereka menerima Islam, tidak timbul masalah jika berlaku silang agama atau kepercayaan asalkan hubungan baik antara keluarga dan masyarakat kampung dijaga dengan sempurna serta tidak meninggalkan adat resam nenek moyang yang sesuai dengan ajaran baharu yang diterima mereka. Malahan interaksi yang baik mendatangkan impak positif dalam pergaulan sesama belia Penan yang berbeza agama dengan membuka ruang pula kepada ahli keluarga untuk memilih Islam sebagai kepercayaan baharu mereka.

Kata Kunci: Penan, Belia, Interaksi, Islam, Bintulu

ABSTRACT

Interaction Penan Muslim youth in the Bintulu Sarawak is still in the early stages including understanding of Islamic teachings, customs and taboos against Islam. Observations made in the study area showed that they practice Islam ajaran at a basic level just like reciting the Kalima, believing the rule of faith and Islam and interact in the same youth group religion without prejudice exists but not on non-Muslims Penan. Therefore this study aimed to analyze the relationship and interaction that exists between young Penan Penan non-Muslim Islam with different

affiliations. The methodology used to perform this research is the study of literature in general affect the location of ethnic Penan settlements Bintulu Division. The field studies involving a number of methods were also carried out. The questionnaire was distributed to 304 respondents in Muslim Penan villages Bt 10, Bt 12 Penan Kg, Kg Penan Bt 12 ½, Penan village Yuh Suburbun Jaya and Kampung Penan Suai. Methods of interviews conducted at random and observations. The study found that there are forms of interaction practiced before Islam and continued to be practiced when they accept Islam, in the event of any problems arising from cross-religion or belief as long as the relationship between the family and the villagers cared for properly and do not leave the customs of the ancestors of the right with new teaching they received. In fact, a good interaction positive impact in youth discussion among the Penan of different faiths with open hand to a family member to choose Islam as their new faith.

Keywords: *Penan, Youth, Interactions, Islam, Bintulu*

PENDAHULUAN

Bintulu mula diisytiharkan sebagai Bahagian pada 31 Ogos tahun 1986 oleh mantan Ketua Menteri Sarawak Datuk Patinggi Tan Sri Hj. Abdul Taib Mahmud dalam majlis pelancaran Hari Kebangsaan 1986. Pada awalnya Bintulu adalah sebuah bandar kecil (1978) dan di kelilingi kampung-kampung tradisional. Pekerjaan utama penduduk Bintulu ketika itu adalah nelayan, petani dan perlombongan. Pada 31 Disember 1986, satu upacara penyerahan watak Bahagian Bintulu telah dilakukan di Pejabat Residen Bintulu dengan disaksikan ketua-ketua masyarakat dan ketua-ketua jabatan. Maka, mulai 1 Januari 1987 Bintulu beroperasi sebagai Bahagian baharu dan memiliki Daerah Bintulu (1960 km persegi), Tatau (2656 km persegi), Sangan (2270 km persegi), Sebauh (3928 km persegi) dan Tubau (1316 km persegi). Keluasan Bintulu adalah 7,220.4 km persegi (5.8%). Menurut Jeffrey Jalong, Bintulu merupakan sebuah kampung nelayan yang terkenal dengan hasil lautnya seperti udang, cencaluk, belacan, hasil getah, kayu jelutong, berlian dan pembalakan (Jeffrey Jalong, 2012). Pada masa kini Bintulu muncul sebagai bandar antarabangsa dan dihuni ramai etnik Melayu, Melanau, Cina, Iban dan warga asing seperti Jepun, Korea dan Eropah. Bilangan penduduk Bintulu pada ketika ini mencecah 216,000, memiliki 2 Daerah iaitu Daerah Bintulu dan Daerah Tatau serta 1 Daerah Kecil iaitu Daerah Kecil Sebauh, 39 buah kampung, 427 rumah panjang, 1 bandar, 1 pekan, 5 pasar kecil dan 7 pusat perkhidmatan seperti di Jadual 1 dan Jadual 2.

Jadual 1: Bilangan Ketua Isi Rumah (Kir) Etnik Penan

Bil.	Kampung Penan	Daerah Pentadbiran	Jumlah Kir
1.	Penan Bt 10	Bintulu	21
2.	Penan Bt 12	Bintulu	11
3.	Penan Bt 12 ½	Bintulu	32
4.	KgYuh Suburbun Jaya	Bintulu	30
5.	Jambatan Suai	Miri	39
JUMLAH			133

Jadual 2: Bilangan Responden Penan

Bil.	Kampung Penan	Daerah Pentadbiran	Jumlah
1.	Penan Muslim Bt 10	Bintulu	21
2.	Penan Bt 12	Bintulu	11
3.	Penan Bt 12 ½	Bintulu	32
4.	Penan Kampung Yuh Suburbun Jaya	Bintulu	37
5.	Penan Jambatan Suai	Miri	203
JUMLAH			304

OBJEKTIF KAJIAN

Setiap kajian pasti ada objektif yang ingin dicapai. Objektif kajian adalah untuk:-

- 1) Mengenal pasti sama ada terdapat interaksi antara belia Penan Islam dengan belia Penan bukan Islam
- 2) Menjawab persoalan kepentingan interaksi ini dan
- 3) Menengenalpasti impak kepada masyarakat Penan dan masyarakat luar yang bukan daripada kalangan etnik Penan.

ANALISIS DAN PERBINCANGAN

Berdasarkan pengamatan pengkaji di lokasi kajian, hubungan belia Penan Islam dengan belia Penan bukan Islam yang terdiri daripada ahli keluarga, sanak saudara,

keluarga pasangan yang beragama Islam, Kristian dan Pagan. Secara keseluruhannya, sebilangan besar mereka menyatakan hubungan dengan ketiga-tiga pihak (Penan Islam, Kristian dan Pagan) adalah baik. Namun terdapat sebilangan kecil mempunyai hubungan (interaksi) yang sedikit renggang antara Penan Kristian dengan Penan Islam (Amphini b. Rambli 2012). Kajian ini mendapati terdapat dua jenis interaksi sosio budaya yang berlaku dalam hubungan kekeluargaan di Kg Penan Muslim Bt 10, Kg Penan Bt 12, Kg. Penan Bt 12 ½, Kg Penan Yuh Suburbun Jaya dan Kg Penan Suai. Pertama adalah interaksi dari aspek hubungan keluarga dalaman dan kedua adalah interaksi dari aspek hubungan keluarga luaran.

Berdasarkan temubual bersama Puan Timah Abdullah, En Naufal Mawing dan Puan Julaihi Piee, kedua-dua hubungan ini dilihat mampu membantu ke arah interaksi yang harmonis dan selanjutnya diterima masyarakat Penan yang bukan Islam kepada Islam. (Timah Abdullah, En Naufal Mawing dan Julaihi Piee. 2012). Dalam Kamus Dewan, interaksi dimaksudkan dengan erti tindakan atau perhubungan yang terjalin secara aktif dan erat antara satu sama lain, atau tindak balas antara dua atau beberapa pihak. Dalam isu interaksi ini, ia berlaku sama ada antara belia Penan Islam dengan para belia Penan bukan Islam atau dengan jiran tetangga, rakan taulan, sanak saudara dan ahli keluarga mereka (Teuku Iskandar, 1998).

‘Hubungan Keluarga Dalaman’ bermaksud hubungan antara belia Penan dengan ibu bapa, sanak saudara atau yang ada pertalian darah yang tinggal dalam sebuah rumah atau kampung yang sama (Yuh b. Menjuai. 2007). Manakala ‘Hubungan Keluarga Luaran’ bermaksud hubungan antara belia Penan dengan sanak saudara yang tinggal di luar kampung atau di kampung berlainan dan jiran tetangga.

Secara keseluruhannya, kajian ini mendapati belia Penan masih lagi kuat menjaga hubungan kekeluargaan dalaman khususnya berkaitan dengan mengambil berat urusan saling ziarah-menziarahi iaitu seramai 141 orang (46.0%), meraikan perayaan Islam secara bersama iaitu seramai 39 orang (13.0%), menjalin hubungan baik sesama etnik iaitu seramai 36 orang (12.0%) dan mengukuhkan ikatan persaudaraan menerusi perkahwinan iaitu seramai 34 orang (11.0%).

Bagaimanapun aspek memahami budaya, adat dan larangan didapati hanya diamalkan oleh segelintir belia Penan iaitu seramai 26 orang (9.0%). Aspek yang paling kurang diambil berat juga oleh belia Penan dalam hubungan kekeluargaan dalaman adalah memberi kesedaran tentang kebaikan Islam iaitu seramai 38 orang (9.0%). (Jadual 3). Menurut Norman Abdullah, kerenggangan interaksi sosial dalam hubungan keluarga dalaman dalam aspek memahami budaya, adat, larangan dan memberi kesedaran tentang kebaikan Islam ini mungkin disebabkan kelemahan mereka memahami ajaran Islam secara terperinci (Norman Abdullah. 2012). Walaupun begitu, penekanan kepada hubungan keluarga yang masih utuh ini adalah peluang terbaik untuk interaksi ini dikembangkan dalam kalangan sanak saudara terdekat.

Jadual 3: Interaksi Dalam Masyarakat Penan

	Bilangan	Peratus (%)
Saling menziarahi	141	46
Ikatan saudara hasil perkahwinan	34	11
Memahami budaya, adat dan Larangan	26	9
Raikan perayaan Islam bersama	39	13
Beri kesedaran tentang kebaikan Islam	28	9
Hubungan baik sesama etnik	36	12
JUMLAH	304	100

Dalam kes masyarakat Penan di lokasi kajian, hasil pemerhatian mendapati golongan belia Penan tanpa mengira agama Islam, Kristian dan animisme menyambut perayaan antara satu sama lain. Menerusi temu bual dengan Ugos B.Sugon, Ketua Kg Penan Suai menyatakan: ‘...*apabila tiba perayaan Islam seperti Aidilfitri atau Aidiladha, masyarakat Penan Kristian dan Animisma akan turut sama meraikan perayaan tersebut, saling ziarah menziarahi dari sebuah rumah ke sebuah rumah. Begitu juga halnya apabila tiba hari Krismas, Tahun Baru Cina dan perayaan kaum mereka* (Ugos b.Sugon, 2007).

Secara keseluruhannya, kajian ini mendapati belia Penan masih mempertahankan budaya bergotong royong bagi mengukuhkan perpaduan iaitu seramai 122 orang (40.0%), diikuti menghadirkan diri ke majlis muhibah antara etnik yang berbagai-bagai-bagai budaya seramai 105 orang (35.0%), berkongsi raya seramai 36 orang (12.0%) dan menghadiri perjumpaan PIBG seramai 20 orang (7.0%). Bagaimanapun, belia Penan yang melibatkan diri dalam persatuan penduduk, bertukar-tukar hadiah dan perkahwinan merentasi budaya, agama dan bangsa, masing-masing menunjukkan bilangan dan peratus yang agak kecil iaitu 11 orang (4.0%), 6 orang (2.0%) dan 4 orang (1.0%). Dapatan ini menunjukkan hubungan menerusi aktiviti-aktiviti di atas dapat digunakan sebaik mungkin oleh belia Penan untuk berinteraksi secara tidak langsung dengan belia Penan yang bukan Islam (Jadual 4).

Jadual 4: Hubungan Kemasyarakatan

	Bilangan	Peratus (%)
Bergotong-royong atau kenduri kendara	122	40
Majlis Muhibah antara etnik berbagai budaya	105	35
Perjumpaan PIBG	20	7

	Bilangan	Peratus (%)
Persatuan penduduk	11	4
Bertukar-tukar hadiah	6	2
Kongsi raya	36	12
Perkahwinan merentasi budaya, agama dan bangsa	4	1
JUMLAH	304	100

Secara keseluruhan kajian menunjukkan seramai 143 orang (85.1%) belia Penan Islam menyatakan suka dengan percampuran agama yang berlaku dalam masyarakat, diikuti dengan belia Penan Kristian seramai 63 orang (52.9%) dan belia Penan yang menurut kepercayaan animisme/paganisme seramai 10 orang (58.8%) berbanding dengan belia Penan yang menyatakan tidak bersetuju iaitu masing-masing menunjukkan responden Islam seramai 25 orang (14.9%), Kristian seramai 56 orang (47.1%) dan animisme/ paganisme seramai 7 orang (41.2%). Dapatan ini (Jadual 5) menunjukkan hampir keseluruhan belia Penan suka tinggal bersama masyarakat berlainan agama dengan mereka dan suka bergaul dengan orang sekeliling tanpa mengira latar belakang agama. Inilah yang dituntut oleh Islam sebagai usaha menyampaikan dan meluaskan agama Islam di muka bumi ini dan perlu diambil peluang oleh semua masyarakat Islam.

Jadual 5: Percampuran Agama

Agama	Suka Kepada Percampuran Agama Dalam Masyarakat		Jumlah
	Ya	Tidak	
Islam	143 85.1%	25 14.9%	168 100%
Kristian	63 52.9%	56 47.1%	119 100%
Animisme / Paganisme	10 58.8%	7 41.2%	17 100%
JUMLAH	216 71.1%	88 28.9%	304 100%

Seramai 88 orang (28.95) seperti mana dalam Jadual 6 bersetuju amalan membantu jiran tetangga merupakan pengisian masa lapang yang baik. Ini menunjukkan interaksi boleh disampaikan melalui amalan yang mulia ini, kerana Islam amat menekankan soal membantu jiran tetangga tanpa mengira agama dan budaya. Bahkan 25.0% bersetuju interaksi boleh disampaikan melalui majlis-majlis kenduri yang diadakan, di samping amalan bergotong-royong (17.1%), kunjung mengunjungi ahli keluarga (20.7%) dan menziarahi sanak saudara (8.2%).

Jadual 6: Pengisian Masa Lapang

	Bilangan	Peratus (%)
Bantu jiran tetangga	88	28.9
Bergotong-royong	52	17.1
Kenduri	76	25.0
Kunjung-mengunjungi	63	20.7
Menziarahi Sanak-audara	25	8.2
Jumlah	304	100

Dapatan kajian (Jadual 7) menunjukkan 43.4 % belia Penan menyatakan golongan remaja dan belia masih menghormati orang tua-tua Penan. Dapatan juga menunjukkan belia Penan yang menyatakan golongan remaja dan belia Penan memiliki keperibadian dan perwatakan mulia adalah tinggi seperti bersopan santun (8.2%), suka melibatkan diri dalam aktiviti bergotong-royong (8.2%), suka membantu orang yang kesusahan (7.6%), patuh dengan arahan Ketua Kampung (6.9%) dan berbudi bahasa. Bagaimanapun terdapat sekumpulan kecil yang masih mentaati kepercayaan lama (17.4%), suka melepak (2.0%) dan tidak melibatkan diri dengan masyarakat kampung (0.3%). Sekiranya golongan remaja dan belia ini berjaya didekati dan diberi kefahaman terperinci tentang Islam, pengkaji berkeyakinan hati-hati mereka akan mudah terbuka menerima ajaran Islam kerana mereka ini sudah memiliki sifat-sifat mulia yang sememangnya merupakan ajaran yang terdapat dalam Islam. Lagipun pemerhatian yang dibuat di lokasi kajian menunjukkan ramai belia Penan tidak lagi mengamalkan kepercayaan lama, berkahwin dengan etnik lain dan bergaul dengan rakan taulan daripada pelbagai bangsa, agama dan keturunan.

Jadual 7: Keperibadian Akhlak Remaja dan Belia

	Bilangan	Peratus (%)
Hormat orang tua	132	43.4
Taat kepada kepercayaan lama	53	17.4
Sopan Santun	25	8.2
Berbudi bahasa	18	5.9
Bergotong royong	25	8.2
Saling membantu orang susah	23	7.6
Patuh arahan Ketua Kampung	21	6.9
Suka melepak	6	2.0
Tidak melibatkan diri dengan masyarakat kampung	1	0.3
Jumlah	304	100

Kajian (Jadual 8) menunjukkan ruang pergaulan dengan jiran tetangga boleh digunakan untuk proses interaksi sesama belia Penan berlainan agama. Faktor kejiranan dan semangat menghormati jiran tetangga sangat mempengaruhi kehidupan masyarakat Penan (Ariffin b. Sabli, 2012). Dalam aspek pergaulan dengan jiran tetangga menunjukkan sebanyak 153 belia Penan (50.0%) bersedia membantu jiran yang ditimpa kesusahan, diikuti dengan memuliakan jiran seramai 72 orang (24.0%), bertegur sapa dengan jiran seramai 48 orang (16.0%), memberi hadiah kepada jiran sebagai tanda ingatan seramai 28 orang (9.0%) dan meraikan anak-anak jiran yang berjaya seramai 3 orang (1.0%). Dapatan menunjukkan amalan ini jika diteruskan akan memudahkan urusan interaksi sesama masyarakat Penan. Lagipun dalam masyarakat Penan budaya membantu jiran tetangga atau saudara mara ini sudah sebatian dengan jiwa mereka. Bagi Penan Islam situasi ini dapat digunakan untuk menerangkan kebaikan Islam melalui amalan menghormati dan membantu jiran tetangga (Raini b. Piee, 2013).

Jadual 8: Pergaulan dengan Jiran Tetangga

	Bilangan	Peratus (%)
Membantu jiran dalam kesusahan	153	50
Memuliakan jiran	72	24
Memberi hadiah ingatan kepada jiran	28	9
Bertegur sapa dengan jiran	48	16
Meraikan kejayaan anak jiran	3	1
JUMLAH	304	100

Kajian ini mendapati (Jadual 9) belia Penan masih bersikap toleransi dengan memberi ruang kepada ahli keluarga yang memeluk Islam bagi menunjukkan Islam yang sebenar iaitu seramai 205 orang (67.4%), diikuti penerimaan yang lebih baik kepada ahli keluarga yang memeluk Islam seramai 62 orang (20.4%). Walaupun begitu terdapat juga sekumpulan belia Penan tetapi dalam jumlah peratusan kecil yang menunjukkan sikap negatif terhadap ahli keluarga atau sanak saudara yang memeluk Islam, masing-masing menunjukkan sikap agresif dan menentang seramai 4 orang (1.3%), dipulaukan dalam pergaulan seramai 11 orang (3.6%) dan tidak menerima Islam sebagai cara hidup seramai 22 orang (7.2%). Dapatan kajian ini menunjukkan perangkaan belia Penan terhadap penerimaan Islam di kalangan ahli keluarga lebih ramai berbanding perangkaan responden yang bersikap negatif terhadap penerimaan Islam.

Jadual 9: Penerimaan Yang Positif dalam kalangan Ahli Keluarga

	Bilangan	Peratus (%)
Dipulaukan dalam pergaulan	11	3.6
Penerimaan yang lebih baik	62	20.4
Menunjukkan sikap agresif dan menentang	4	1.3
Tidak menerima Islam sebagai cara hidup	22	7.2
Beri ruang untuk tunjukkan Islam yang sebenar	205	67.4
JUMLAH	304	100

Kajian ini mendapati belia Penan di Kg Penan Bt 10, Kg Penan Bt 12, Kg Penan Bt 12 ½, Kg Penan Yuh Suburbun Jaya dan Kg Penan Suai menunjukkan sikap positif terhadap ahli keluarga dan sanak saudara yang baharu memeluk Islam. Berdasarkan temu bual dengan seorang belia Penan, berusia 38 tahun, penduduk asal Kg Penan Bt.10 yang bekerja sebagai pemandu bas UPM Kampus Bintulu (Meraie b.Abdullah 2007) menyatakan bahawa: ‘...tidak timbul masalah jika ada antara keluarga kami yang memeluk Islam kerana kami dulu pun tiada beragama...’. Begitu juga dengan pemerhatian yang dilakukan di sekitar kelima-lima perkampungan Penan di atas, kajian mendapati (Jadual 10) majoriti belia Penan menerima kemasukan Islam dengan baik ke kampung mereka. Dapatan ini menunjukkan penerimaan Islam bukan masalah kepada masyarakat Penan tetapi suatu perubahan yang baik. Ini adalah kerana terdapat 100 orang (33.2%) responden yang menyatakan responden diterima sebagai saudara baru, diikuti seramai 85 orang (27.2%) responden yang berfikiran positif dan memberi galakan, seramai 66 orang (21.9%) responden yang suka dengan perubahan yang berlaku dan seramai 53 orang (17.6%) responden menyatakan ahli keluarga yang memeluk Islam itu mampu menjadi penganut Islam yang baik.

Jadual 10: Berfikiran Terbuka terhadap Ahli Keluarga yang Memeluk Islam

	Bilangan	Peratus (%)
Sebagai saudara baru	100	33.2
Mampu menjadi penganut Islam yang baik	53	17.6
Suka dengan perubahan yang berlaku	66	21.9
Berfikiran positif dan memberi galakan	85	27.2
JUMLAH	304	100

KESIMPULAN

Kajian ini dapat disimpulkan bahawa interaksi sosial memberi sumbangan yang baik dalam perkembangan interaksi sosial dalam kalangan masyarakat Penan. Interaksi dan hubungan baik antara ahli keluarga sendiri, pasangan, jiran tetangga, golongan remaja dan belia serta masyarakat kampung mencatatkan perkembangan positif dalam konteks penerimaan Islam. Seterusnya membantu dalam perkembangan interaksi yang baik sesama masyarakat Penan tempatan. Sehubungan itu kemahiran berinteraksi adalah kemahiran yang sangat besar dan bermanfaat. Belia Penan yang berketerampilan dalam berinteraksi selalunya akan dipandang sebagai orang yang mudah untuk dibawa bicara dan dipercayai kata-kata mereka. Dengan kelebihan tersebut seseorang belia Penan akan lebih mudah mempengaruhi masyarakat dan ahli keluarga agar mengubah pegangan atau kepercayaan lama mereka kepada pemikiran dan keyakinan yang berteraskan ajaran Islam. Interaksi yang berkualiti juga mampu memberi kesan yang kuat kepada komunikasi, kejujuran, pujukan dan perubahan positif terhadap sasaran (mad'u).

RUJUKAN

- Amphini b. Rambli. 2012. *Bentuk-bentuk Interaksi Di Kalangan Etnik Penan*. Penduduk Kg Penan Bt 12 ½. Temu bual, 28 Mac.
- Ariffin b. Sabli. 2012. *Hubungan Etnik Penan Islam Dengan Etnik Penan Bukan Islam*. Bintulu. Sarawak. Temu bual, 10 September.
- J. Peter Brosius. April 1992. Perspectives On Penan Development In Sarawak. *Sarawak Gazette Journal*. Kuching, Sarawak. V.CXIX, No.1519.
- Jamali b. Langajan. 2012. *Amalan Bebayoh Di Kalangan Etnik Penan Kg Belipat Niah*. Bahagian Miri. Temu bual, 8 September.

- Jayl Langub. Dec.1995. Penan Marriage Customs: A General Description. *Sarawak Gazette Journal*. V.CXXII. No.1534.
- Jayl Langub. Julai 1992. Some Eastern Penan Tradisional Prayers. *The Sarawak Gazette Journal*. No.1520. Vol.CXIX. Kuching. Sarawak.
- Jefrey Jalong. 2012. Bintulu. Temu bual, 6 September
- Meraie Abdullah. 2012. Penduduk Penan Bt 12. Temu bual 19 Mac.
- Norman Abdullah. 2012. Pengerusi Urusetia Saudara Kita Cawangan RPR Kidurong, Bahagian Bintulu Sarawak. Temu bual. 3 November.
- Teuku Iskandar. Dr. et.al. 1998. *Kamus Dewan*. Ed. Ke-3. Kuala Lumpur: Penerbit Dewan Bahasa dan Pustaka.
- Timah Abdullah, En Naufal Mawing dan Pn Julaihi Piee. 2012. Kampung Penan Bt.12. Temu bual, 28 Mac.
- Yuh b. Menjuai. 2007. Kg Penan Yuh Suburbun Jaya. Temu bual, 24, 25 & 29 Mac.

Profil Penulis:

Ahmad Nasir Mohd Yusoff, Ph.D
Jabatan Pengajian Kenegaraan Dan Ketamadunan
Fakulti Ekologi Manusia
Universiti Putra Malaysia
Tel: 03-89467255
Faks: 03-89467151
Emel: ahmadnasir@upm.edu.my